

दिनांक 17.06.2024

समय: 18.45 बजे

आकाशवाणी जयपुर-अजमेर

समाचार

- प्रधानमंत्री नरेंद्र मोदी काले देश रा 9 करोड़ 26 लाख ऊं बत्ती लाभार्थी काश्तकारां ने पीएम किसान सम्मान निधि री 17वीं किश्त जारी करेला।
- मुख्य सचिव प्रदेश मांय एक जुलाई ऊं लागू होवण वाळा तीन नुवां आपराधिक कानूनां रा बारां मांय लोगां ने जागरूक करण रा निर्देश दिया।
- प्रदेश रा सांगानेर, अजमेर अर पाली रेल्वे ठेसणा रो 8 सौ 50 करोड रूप्या री लागत ऊं व्हेला पुनर्विकास।

अर

- देशभर मांय ईद-उल-अज़हा रो तिवांर रीत मुजब उमाव रे साथै मनायो जावे।

000

प्रधानमंत्री नरेंद्र मोदी काले देश रा 9 करोड़ 26 लाख लाभार्थी काश्तकारां ने **पीएम किसान सम्मान निधि** री 17वीं किश्त काढेला। इण रे तैत 20 हजार करोड़ रूप्या सीधा लाभार्थियां रा बैंक खाता मांय भेजी जायेला। ई मौके 30 हजार ऊं बत्ती स्वयं सहायता समूह री महिलावां ने **कृषि सखी प्रमाण पत्र** ई दिया जायेला। खास कार्यक्रम रो आयोजन प्रधानमंत्री नरेंद्र मोदी री मौजूदगी मांय वाराणसी मांय कर्यो जायेला, जद के देश रा न्यारा-न्यारा हलकां मांय 50 केंद्रां माथे केन्द्रीय मंत्रियां री मौजूदगी मांय कार्यक्रम व्हेला। अजमेर मांय में **राष्ट्रीय बीजीय मसाला अनुसंधान केंद्र** मांय होवण वाळा कार्यक्रम मांय खास मेहमान रा रूप मांय केंद्रीय कृषि अर किसान कल्याण राज्यमंत्री भागीरथ चौधरी मौजूद रहवेला और ब्यौरो म्हाणा खबरनवीस ऊ-

000

प्रदेश मांय आवती एक जुलाई ऊं 3 नुवां कानून भारतीय न्याय संहिता 2023, भारतीय साक्ष्य अधिनियम 2023 अर भारतीय नागरिक सुरक्षा संहिता 2023 लागू व्हे जायेला। मुख्य सचिव सुधांश पंत री सदारत मांय आज शासन सचिवालय मांय नुवा कानूनां रा बारा मांय मीटिंग व्ही। श्री पंत कह्यो के पुराणा कानूनां री ठौड़ लाया जा रह्या नुवा कानून आपा रा संविधान री तीन मूल भावनावां-व्यक्ति री स्वतंत्रता, मानवाधिकार अर सगळा रे साथै समान व्यवहार रा सिद्धांत रा आधार माथे बणायी ज्या है। वणा बतायो के नुवा कानूनां मांय महिलावां अर टॉबरां रे खिलाफ अपराध, मानव शरीर माथे असर

करण जस्या मामला ने प्राथमिकता दीरीजी है। मीटिंग मांय मुख्य सचिव संबंधित मेहकमां ने निर्देश दिया के तीन नुवां कानूना रा बारा मांय लोगां मांय जाग जगावे, खास कर महिलावां अर टॉबरां ने नुवां कानूनां रा बारा मांय बताया जावे। श्री पंत गृह विभाग ने हुकम दिया के वकीलां ऊं तालमेल कर ने हर ग्राम पंचायत, पंचायत समिति, नगर निकाय, नगर पालिका ने नुंवा कानूनां री जाणकारी करायी जावे।

000

आकाशवाणी समाचार जयपुर कानी ऊं प्रादेशिक समाचार बुलेटिनां मांय तीन नुवां आपराधिक कानूनां रा बारा मांय जाग—जगावण रा मकसद ऊं कड़ी चलायी जाय री है। इण रे तैत आज जाणकारी देवा सामुदायिक सदभाव के माध्यम से न्याय दिया जावण रा बारा मांय —

भारतीय कानून प्रणाली मांय में छोटा अपराधां रा मामलां मांय नुवा आपराधिक कानूनां मांय सामुदायिक सेवा री सरुआत एक क्रांतिकारी कदम है। सामुदायिक सेवा रे तैत एक तैय बगत मांय बिना पगार रे काम कर ने नुकसाण भरण री मंजूरी रा रूप मांय करी ज्यी है। ओ अपराधी ने उण रे करी ज्या काम सारु जिम्मेदारी देवे है अर जेळ री सजा रा बोझ ने कम करे है। सामुदायिक सेवा जरूरत मंद लोगां सारु न्यारा—न्यारा समूह मांय मदद कर सके है। टॉबरां, बुजुर्गा, दिव्यांगा अर भाषा सिखण वाळां समूह रे साथ ही पनाह री ठौड़ां माथे जिनावरां ने मदद करे है। समुदायिक सेवा ने बगीचा, ऐतिहासिक इमारतां अर देखण जोग ठौड़ां ने चोखा बणावण सारु ई काम मांय ली जा सके है।

000

आवती 21 जून ने **अंतर्राष्ट्रीय योग दिवस** रा 10 वां संस्करण ऊं पैला प्रधानमंत्री नरेंद्र मोदी आज सोशल मीडिया माथे भद्रासन करता आप रो एक वीडियो पोस्ट कर्यो है। वीडियो साझा करता प्रधानमंत्री इण बात माथे जोर दियो है के भद्रासन जोड़ां ने मजबूत करण अर घुटनां मांय दर्द ने कम करण सारु कारगर है साथै ई पेट सारु ई फायदेमंद है। अठिने प्रदेश मांय ई न्यारी—न्यारी ठौड़ां माथे योगाभ्यास अर योग महोत्सव व्हे रह्या है। जैपर मांय काले ऊं सरु व्ह्यो अखण्ड योग आर पूरण व्ह्यो। नगर निगम ग्रेटर री महापौर डॉ. सौम्या गुर्जर री पहल माथे सरु करी ज्या ई योगाभ्यास मांय बिना रूक्या पन्द्रह सौ मिनट ताई योगासन करी ज्या। ग्रेटर निगम अर इक्यावन संस्थावां री मदद ऊं व्ह्या ई योगाभ्यास मांय योग साधका, प्रशिक्षकां अर योगाचायां सूर्य नमस्कार समेत न्यारी—न्यारी योग क्रियावां करी। योग दिवस माथे जयपुर रा सगळा चिकित्सा संस्थानां मांय योगाभ्यास रो आयोजन व्हेला। जालौर जिला मांय आयुर्वेद मेहकमां कानी ऊं 21 जून ताई सगळा वेलनेस सेंटरां माथे योग सप्ताह रो आयोजन कर्यो जावे। अन्तर्राष्ट्रीय योग दिवस ने ले र दौसा मांय ई केई ठौड़ां योगाभ्यास कर्या जावे।

21 जून ने जिला थर रो कार्यक्रम रामकरण जोशी राजकीय उच्च माध्यमिक विद्यालय मांय व्हेला। बूंदी मांय योग सप्ताह रे चौथे दिन आज जोडां के दर्द और आर्थराइटिस मांय फायदेमंद योग रो अभ्यास करायी ज्यो।

000

ब्रेक

जयपुर रा सांगानेर, अजमेर अर पाली रेल्वे ठेशन माथे संस्कृति अर विरासत री झलक देखण ने मिलेला। रेलमंत्री अश्विनी वैष्णव तीनु ठेशन रा पुनर्विकास योजना ने मंजूरी दे दी है। वीडियो कॉन्फ्रेंसिंग री मार्फत मीटिंग मांय रेलमंत्री कह्यो के जयपुर रा सांगानेर ठेशन ने गांधीनगर अर जयपुर जंक्शन री तरह विश्व थर रो बणायो जायेला। आ तीनु ठेशणा माथे कोई 8 सौ 50 करोड़ रुप्या री बत्ती रकम खर्च व्हेला। आ ने सिटी सेंटर री तर्ज माथे विकसित कर्या जायेला।

000

पश्चिम बंगाल मांय सियालदाह जाय री कंचनजंगा एक्सप्रेस रे एक मालगाडी ऊं टकरा जावण ऊं तीन रेलवे अहलकारां समेत आठ लोगां री मौत व्हे गयी अर 50 दूजा घायल व्हे ग्या। ओ हादसो आज संवारा न्यू जलपाईगुडी रेलवे ठेशन कने व्हयो। रेलवे अहलकारां मुजब मालगाडी, सिग्नल ऊं आगे निकळ गयी अर कंचनजंगा एक्सप्रेस रा लारला हिस्सा ऊं टकरा गयी। गाडी रा लारला हिस्सा मांय दो पार्सल वैन अर गार्ड कोच लाग्या हा। उठिने रेल मंत्री अश्विनी वैष्णव कह्यो के पीडितां ने बधयोडी मदद री रकम दी जायेला। वणा कह्यो के मरण वाळां रा पिरवारजना ने 10 लाख रुप्या, गहरा घायलां ने 2 लाख 50 हजार अर मामूली घायल लोगां ने 50 हजार रुप्या दिया जायेला। रेल हादसा ने ले र प्रदेश रा मुख्यमंत्री भजन लाल शर्मा दुःख जतावता पीडित पिरवारां रे प्रति शोक जतायो है। वठे ई पैली रा मुख्यमंत्री अशोक गहलोत ई रेल हादसा मांय मरण वाळा रा पिरवारां अर घायलां रे प्रति शोक जतायो है।

000

उदयपुर जिला मांय गोगुन्दा पिंडवाडा राजमार्ग माथे आज एक ट्रेलर री टक्कर ऊं पांच राहगीरां री मौत व्हे गयी। हादसा रे पछे ट्रेलर बेकाबू व्हे र खाई मांय पलट ग्यो। हादसा मांय एक गैरा घायल मिनख ने महाराणा भूपाल अस्पताल मांय भर्ती करायी ज्या है। जाणकारी मुजब बेकरिया थाणा हलका रा रेहवण वाळां पांच मजूर आप रा काम सारू सडक माथे पैदल जा रह्या हा। ई दौरान भाटा ऊं भर्या ट्रेलर रे टक्कर मारण ऊं ओ हादसो व्हयो। हादसा रे पछे सडक माथे यातायात रूक ग्यो जिण ने पछे पुलिस खुलवा दिया।

000

ईद—उल—अजहा आज देशभर मांय रीत मुजब उमाव रे साथे मनायो जावे। प्रदेशभर मांय ई मौके ईदगाहां अर मस्जिदां मांय ईद री नमाज अदा करी ज्यी। राजधानी जयपुर मांय दिल्ली रोड माथे ईदगाह मांय घणी तादाद मांय मुस्लिम समुदाय रा लोगां सजदा मांय सिर झुकाया अर देश मांय अमन चैन अर भाईचारा री दुआ मांगी। केकडी मांय मुस्लिम धर्मावलम्बियां भेळी नमाज अदा करी। शहर मांय ईदगाह, भट्टा कॉलोनी री मदीना मस्जिद समेत न्यारी—न्यारी मस्जिदां मांय नमाज अदा करी ज्यी। वठे ई टोंक जिला मांय ई **ईद—उल—अजहा** रीत मुजब हरक रे साथे मनायो जावे। ई मौके जिला मुख्यालय माथे इदगाह माथे भेळी नमाज अदा करी ज्यी। बारां मांय अस्पताल रोड माथे ईदगाह मांय ईद री नमाज अता करी ज्यी अर देश मांय अमन—चैन री दुआ मांगी ज्यी। ई मौके पुलिस प्रशासन रा आला अहलकार ई मौजूद रह्या। बीकानेर मांय ई ईद—उल—अजहा रो तिवार रीत मुजब उमाव रे साथे मनायी ज्यो। चित्तौडगढ मांय ईदगाह मांय शहर काजी अब्दुल मुश्तफा चिश्ती री सदरत मांय नमाज अदा करी ज्यी। जिला रा कपासन, निम्बाहेडा, बेगूं, बडी सादडी समेत न्यारा—न्यारा कस्बा मांय

भेळी नवाज अदा करी ज्यी। ई मौके गरीब अर जरूरत मंद लोगां ने जकात रा रूम मांय दान ई दीरीज्यो। उदयपुर, चूरू अर धौलपुर मांय ई **ईद—उज—अजहा** रो तिवार रीत मुजब उमाव रे साथै मनायो जावे।

000

प्रदेश मांय केई ठौड़ां निर्जला एकादशी रो तिवार मनायो जावे। ई मौके भरतपुर मांय मिंदरा मांय धार्मिक अनुष्ठान व्ह्या। किला रा बिहारी जी मिंदर मांय संवारा ऊं सिरधालुआं रो तांतो लाग्यो रीयो। न्यारा—न्यारा सामाजिक संगठनां केई ठौड़ां माथे शरबत री छबील अर ठण्डा पाणी री प्याऊ लगायी। ई मौके घणी तादाद मांय सिरधालू गोवर्धन धाम पूग र सात कोस री परिक्रमा लगायी। वटे ई गौशालावां मांय हरो चारो खिला र गायां री पूजा ई करी ज्यी। राज्य रा केई ठौड़ां निर्जला एकादशी रो तिवार काले ई मनायो जायेला। सीकर जिला रा नाम खाटू श्याम जी मांय निर्जला एकादशी रे मौके सिरधालू पूग रह्या है। उदयपुर मांय निर्जला एकादशी रीत मुजब बनायी जावे। जगदीश जी मिंदर, श्रीनाथ जी मिंदर मांय संवारां ऊं भगत पूग रह्या है। शहर मांय न्यारी—न्यारी ठौड़ां लोगां ने शर्बत, फळ बाटी ज्या ।

000

प्रदेश मांय लारला 24 घंटा मांय घणकरी ठौड़ां मौसम सूखो रह्यो। दिन अर रात रा तापमान मांय कमी रे बावजूद करडी गर्मी अर उमस रो असर बण्योडो है। मौसम केन्द्र जयपुर मुजब सब ऊं बत्ती 46 दशमलव 5 डिग्री सैल्सियस तापमान रे साथै श्रीगंगानगर सब ऊं गर्म ठौड़ रह्यो। वटे ई घणकरी ठौड़ां तापमान 42 डिग्री सैल्सियस ऊं उपर दर्ज करी ज्यो। बीकानेर अर जयपुर संभाग मांय कुछ ठौड़ां हीट वेव दर्ज करी ज्यी। मौसम केन्द्र जयपुर आज श्रीगंगानगर, हनुमानगढ, चूरू, झुन्झुनू, अलवर, भरतपुर, दौसा, करोली अर धौलपुर जिला मांय हीट वेव चालण रो येलो अलर्ट जारी करी ज्यो है। कोटा अर उदयपुर संभाग मांय कठे—कठे ई बिरखा री आस जतायी ज्यी है। वटे ई 19 जून ऊं कोटा, उदयपुर, जयपुर अर बीकानेर संभाग मांय कठे—कठे ई बिरखा री आस है।

000

प्रदेश रा 26 सरकारी कॉलेजां रो बेगा ई कायाकल्प व्हेला। केंद्र सरकार री प्रधानमंत्री उच्चतर शिक्षा अभियान —**पीएम उषा योजना** रे तैत बूंदी जिला ने 10 करोड़ रुप्या रो बजट मंजूर करी ज्यो है। इण रे तैत जिला रा नैनवा अर हिंडोली रा राजकीय कॉलेजां ने आधुनिक बणाया जायेला। ई योजना रा तैत देश रा 3 सौ 21 कॉलेजां सारू न्यारो—न्यारो बजट काडी ज्यो। वटे ई **पीएम उषा योजना** रे तैत राज्य रा कुल 26 कॉलेजां ने पांच—पांच करोड़ रुप्या री सबसिडी रकम मंजूर करी ज्यी है।

000